

Cumprar legums en stizun ei sfarlatau raps



„Avon quatter onns ha mia mumma semnau per l'emprema gada in iert davos casa. Ussa stuein nus buca pli cumprar legums. Quei ei grondius. Jeu carezel il curtgin. El ei fetg impurtonts per nossa famiglia e gida nus fetg. Nossa famiglia ha numnadamein strusch raps.

Jeu vivel cun mia mumma e miu frar Athenkosi, ch'ei dus onns pli vegls ch'jeu, a Polar Park, in habitadi per paupers a Dimbaza ell'Africa dil sid. Miu bab va cun taxi el marcau dad East London e vegn mo a casa la fin d'jamna. Perquei che nus havein mo in letg stuein jeu e miu frar durmir en cuschina giun plaun.

Mia mumma s'engascha tier la „Gruppa da dunnas ruralas“, in'organisaziun da partenadi dall' „unfrenda da cureisma“. Dad ella haiel jeu empriu che grascha da vaccas gida las plontas a crescher. Nus duvrein neginas chemicalias.

Era la crema da suleagl en mia fatscha ei natirala. Ella senumna Imbola ed jeu fetschel ella ord ina mischeida tradiziunala da plontas. Jeu mettel si ella mintga di sin mia fatscha per schurmegiar mia pial dil suleagl.

Per mei secapescha ei da sesez da gidar suenter scola en iert. Nus havein dus orts, in grond che schai sper mia via da scola ed in pign davos nossa casa. Ils legums da davos casa ein mo per nossa famiglia. Da quei iert mirein miu frar ed jeu: tgi ch'ei gl'emprem a casa bogna las plontinas.

Jeu cuschinel era bugen. Il pli bugen legums ord iert: Jeu tagliel ina tschaguola e brassel ella cun in tec ieli en ina cazzetta. Lu tagliel jeu truffels e mettel vitier els. Sch'els ein bunamein cotgs, mettel jeu aunc viaden empau baguos. Empriu da cuschinar haiel jeu da mia mumma: adina cu ella cuschina, mirel jeu tier.

Miu liug preferiu ei denton buc il curtgin, mobein nossa baselgia. Leu entaupel jeu Endinako, mi'amatga da scola. Leu emprendel jeu dapli da Jesus. Jeu sun mintga sonda en baselgia – gl'entir avonmiezdi.

A scola mondel jeu bugen. Jeu emprendel fetg bugen. Jeu mon ella siatavla classa. Mias notas ein bunas, jeu saudel denton buca denter ils megliers da mia classa. Pli tard viel jeu daventar actura en in teater.

Jeu siemiel che mia mumma anfli ina lavur pagada e che l'entira famiglia vivi ensemen en ina gronda casa.“

Arriwe Manisi (12 onns)